

## جدّي

كان زمان زمن الطراوة  
والعصاري تحت نخلة  
وحبّتين ضحك وشقاوة  
لما كانت الابتسامة  
تروق وتحلى  
كنا نجري ع الجسور  
حلمنا حلم الطيور  
إن تبقى الدنيا ضلّة  
بس فارشة الأرض نور  
والجبين يتبلّ بلة  
وامّا ترفع حلق قلة



تلقي مائه...

ليها طعم يبيل ريق

واما تنزل أرض غلة

تلقي سبلة تشد حيلك

ع الطريق

...

العيال كات لسه طازة.. لسه خام

والحياة كات زي مائه تحت زير

في الزمن دا ما كانش لسه

حد يعرف ف الخصام

الوظايف كان آخرها

في الدرك تصبح غفير

جدي كان من طبعه طيب

كان بيّفهم في القراية والكتابة  
أصله كان غاوي العلام  
كان له صوت شبه الربابة  
لما يحكي عن سلفنا من الصحابة  
وناس كرام  
جدي كان أرض الطيابة  
لما تطرح عود زتون  
لما تأوي جوزين حمام  
جدي كان له بجد هيبة  
لما كان يحضر في مجلس  
كله يُربط ع الكلام  
بالأدب والاحترام  
جدي كان شيخ الغيطان



كان إمام الفلاحين  
كان يعدّي ع الأراضى  
بصوت منادى  
يشدّ همّة عرقانين  
كان يططب ع الشتايل  
كان يسمّى في العزيق  
لاجل أرضه لما تطرح  
خير يكفّي للتقاوي والخزين  
قوت يكفّي الشغّالين  
فيه نصيب المحتاجين  
منه سترة للبنات والشباب  
لو يكمل نص دين  
جدّي، كان العصر يقعد

جنب توتة.. كان قصادها نخلتين

ييجي ابويا ف ايده عمي

والجيران والكلام

عن خير بلدنا بروح لمين

عن عرفنا وعن شقانا

والأراضي ليه حزاني

من عمائل المسئولين

إن دود القطن كئنا.. وكل عيالنا

وان سبل القمح سوس

لما ضي الشمس فئس

في النهار.. الخلق نايمة كسلانين

وان صوت مكن الدراس.. ترسه صدّي

ماعادش قادر ع الطحين



والعيال في المدارس  
علموهم إن آخرة العلام  
نوم وقعدة ع القهاوي  
وسط لمة عطلائين  
عن تقاوي القطن ماتت بالمبيد  
وعن أراضى.. القطر كلها  
زرعوا فيها شريط حديد  
والشيوخ اللي ف بلدنا  
ودن طين، وألف ودن من العجين  
جدي دايمًا كان يصلي  
الفجر حاضر  
لما يصحى كنت اقول انه مسافر  
بس مش عارفين لفين

للزمان اللي احنا فيه  
ولآ زمن القطر عدّى وداس عليه  
جدي كان دايماً بيحزن  
واحنا مش عارفينه ليه  
كان له قلب ودمع عين  
كان يحسّ بناس غلابة ومظلومين  
كان يخاف سفر العيال  
لما يتقل حمل يصعب فيه مشال  
كان يخاف الغربة تطول بالسنين  
كان يخاف الأرض تدبل أو تشقق  
وان نور الصبح يزهب  
ولآ يرفض يوم يشقق  
وان طيرنا يوم يهاجر ولآ يغرق

زي فجر المقهورين

...

شفت دمه بدون كلام  
يوم ما زارني في المنام  
قال لي:

بكرة يرجع الغريب  
بكرة أرضه في يوم تطيب  
انت مين؟

قال لي:  
جداك من زمان الطيبين،  
وانت مين؟!

قلت:  
واحد من زمان الدبلانين.